



Inatsisartunut ilaasortaq

Lars Poulsen, Siumut

/Maani

§37 najoqqutaralugu apeqqut 218-2025 Tasiilami eqqaanilu nunap sajullattaanera

Allakkat ulluat: 23-12-2025
Suliap normua: 2025 - 26363
Allagaatip ilisarnaataa:

Asasara Lars Poulsen,

Postboks 1614
3900 Nuuk
Tlf.: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Inatsisartut suleriaasianni § 37, imm. 1 naapertorlugu

(Tasiilami_eqqaanilu_nunap_sajullattaanera) pillugu Naalakkersuisunut
apeqquteqaateqarputit. Apeqqutit uannut akisassanngorlugit innersuunneqarput.

1. Ukioq manna 2025 qasseriarluni nalunaarsuisoqarsimappat nuna sajuppa?

Akissut: Pinngortitamut Avatangiisinullu Naalakkersuisoqarfiup GEUS
akissuteqartippaa, tassanngaanniillu oqaatigineqarpoq: *"Tasiilap eqqaani
sumiiffimmi (64-67N, 34-40W) 2025-p aallartinneraniit ullumimut nunap sajunneri
553-it paasineqarput. Taakku siornatigumut sanilliullugit amerlanerujussuupput.
2024-mi sumiiffimmi tassani nunap sajunneri 58-t, aamma 2023-mi 190-it, 2022-mi
116-it aammalu 2021-mi 167-it nalunaarsorneqarsimapput. Nunap sajunneri
sumiissusersineqartut saniatigut nunap sajunneri sakkortunngitsut GEUS-ip
uuttortaavianiit ataatsimit marlunnilluunniit malugineqarsimapput, taamaattumillu
sumiissusersineqarsinnaanatik. GEUS-ip nunap sajunnerinut iserfissiaani nutaami
([Data- & kortservice](#)) Kalaallit Nunaanni nunap sajunnerinut paasissutissat
sukumiinerusut takuneqarsinnaapput."*

2. Nuna sajukkaangat uuttuutit suut atorreqartarpat? Qanorlu sakkortussuseqarneranik uuttortaasoqartarpa?

Akissut: Pinngortitamut Avatangiisinullu Naalakkersuisoqarfiup GEUS
akissuteqartippaa, tassanngaanniillu oqaatigineqarpoq: *"GEUS sajunnernik*


uuttortaaniarluni seismometerinik atuisarpoq. Taakku atortuupput malussarissut, pingasunik aallaavilerlutik (qummut/ammut, avannamut/kujammut aamma kangimut/kimmut) sajunnernik uuttortaasartut. Sekundimut 100-riarlutik uuttuisarput. Paasissutissat erngertumik GEUS-imut nassiunneqartarput, tassanilu paasissutissat ullualuit qaangiukkaangasa misissoqqissaarneqartarput. Nunap sajunnerisa sakkortussusaat nanometerinngorlugit naatsorsorneqartarput. Uttortaavimmiit nunap sajuffianut ungasissuseq ilisimaleraangatsigu, sakkortussuseq Richterskala atorlugu naatsorsorsinnaalertarparput. Nunap sajunneri sakkortunerit nunarsuarmi sumiiffinni arlalippassuarni takuneqarsinnaapput, sakkortussusaallu aamma assersuutigalugu USGS (United States Geological Survey – GEUS-ip USA-mi suleqataa) sakkortussusaannik naatsorsuisarpoq. Taakku uuttortaavinni ungasinnerusuni uuttortakkat tunngavigalugit naatsorsueriaaseqartarput. Naatsorsukkalli tamatigut assigiinneq ajorput, tamannalu nalinginnaalluinnarpoq. GEUS Tasiilami Isortumilu sumiiffimmut uuttortaavinnik ingerlataqarpoq, taakkulu uuttortagaat Kalaallit Nunaanni uuttortaaviit allat peqatigalugit Tasiilap eqqaani nunap sajunnerisa sumiiffissiniarnerinut atorneqartarput. Tasiilami Isortumilu seismometerit STS-2-t atorneqarput, taakkulu nunap sajunnerini maligaasat 0,008Hz-iniit (120 sekundit) 50 Hz-inut uuttortarsinnaavaat.”

3. Sajuttarnerani sakkortunerpaagami qanga sajunneq piva? Aamma sajunnera qanoq sakkortutigaa?

Akissut: Pinngortitamut Avatangiisinullu Naalakkersuisoqarfiup GEUS akissuteqartippaa, tassanngaanniillu oqaatigineqarpoq: ”2025-mi Tasiilap eqqaani nunap sajunnera 23. novembari 2025 nal. 03:03 utc (kalaallit nalunaaqutaat malillugu 01:03) pivoq. Taanna Richterskala malillugu ML4.2-mut uuttortarneqarpoq, aammalu uuttortaavinni ungasinnerusuniit M4.8-mut uuttortarneqarluni. Ukiuni kingullerni 25-ni GEUS-ip Tasiilap eqqaani nunap sajunneri ML4.0-imit sakkortunerusut pingasut sumiiffissivai, taakkunannga marluk 2025-mi pipput. Taakkulu saniatigut nunap sajunneri, ML3.5-imit sakkortunerusut quliupput, taakkunanngalu sisamat 2025-mi pillutik.”

Aamma GEUS Kalaallit Nunaanni nunap sajunneri uuttortarneqartut pillugit imatut saqqummiussaqqarpog, *''Ilumoorpoq Kalaallit Nunaata kangiata kujataani nunap sajunnera M5.4-mik sakkortussusilik Kalaallit Nunaanni nunap sajuttarnerani sakkortunersaanera. Nunap assingani tamatigut naatsorsukkani annersaat takutinneqartarpoq. Atortut digitaliusut atulorfissaat sioqqullugu taamatut nunap sajuttarnerisa sakkortussuserisartagaannut naatsorsukkat paasissutissanik digitaliusunik atuilernitsinni nunap sajuttarnerinut nutaanerusunut sanilliullutik nalorninarnerupput. Taamaattumik annertussutsimut naatsorsukkat nalorninaateqartutut isigineqartariaqarput.''*

Assimi seismometeri Tasiilami naqqup ataanut ilineqarsimasog, kiisalu nasaasag illersuutaasog takuneqarsinnaapput.





4. Upalungaarsimaneq sillimaniarnerlu eqqarsaatigalugu oqartussat qanoq pilersaaruteqarpat?

Akissut: Pisoqassappat pisoq kommunimi najukkami annaassiniarnernut upalungaarsimasut isumaginnittussaapput, Tasiilamullu tunngatillugu Kommuneqarfik Sermersooq isumaginnittuusussaavoq. *Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaanni nr. 14-mi § 1-imi allassimasutut Kommunit annaassiniarnissamut upalungaarsimasuutitanik pilersitsissapput, taakkua suliassarissallugu ajutoornerni ajunaarnersuarnilu, imaluunniit taamaattoqarnissaanik annertuumik aarlerinartorsiornermi inuit, pigisat avatangiisillu ajoqusernissaannik pitsaaliuinissaq, killilersimaartitsinissaq ikiorsiinissarlu.*''

Kommunit annaassiniarnissamut upalungaarsimasui naammannangeriataassappata, aammalu immikkut ittunik pisoqartillugu Kalaallit Nunaanni upalungaarsimasut sulilersinneqassapput. Tamanna Kalaallit Nunaanni Upalungaarsimanermut Ataatsimiititaliarsuup aggersarneqarneratigut pissaaq. *Kalaallit Nunaanni*

*annaassiniarnissamut upalungaarsimaneq aamma ikuallattoornissamik
qaartoornissamillu pitsaaliuinermi iliuusissat pillugit Inatsisartut inatsisaanni nr.
14-mi § 3, imm. 3-mi allaqqavoq, Annertuunik ajutoortoqartillugu
ajunaarnersuaqartilluguluunniit, imaluunniit pisariaqartitsisoqartillugu
Upalungaarsimanermut Ataatsimiititaliaq aggersarneqartassaaq. Siulittaasup
imaluunniit siulittaasup tullersortaata upalungaarsimanermut Ataatsimiititaliap
sulinera aallartissinnaavaa.”*

Nunap sajunneranik, innuttaasunut ulorianartorsiortitsisunik pisoqassappat,
annaassiniarnissamut upalungaarsimasut aamma Kalaallit Nunaanni
upalungaarsimasut ajornartoornermik isumaginnittuussapput, taamaalillutillu
innuttaasumut isumannaallisaanikkut toqqissisimatitsissallutik.

5. Perusissiortoqarpa?

Akissut: Ajornartoorqartillugu sullissisoqarnissaanut periusissiaq kommunimi
najukkani isumaginninnissamut upalungaarsimanermut pilersaarummi
allaaserineqarpoq, aammalu immikkut ittumik pisoqartillugu periusissiaq Kalaallit
Nunaanni nunami namminermi isumaginninnissamut upalungaarsimanermut
pilersaarummi allaaserineqarluni. Upalungaarsimanermut pilersaarutit taakku
pilersaarusionik pingaarnernik, pisuni arlalinni aallaavittut atorneqarsinnaasunik
imaqartinneqarlutik suliarineqarput, taakkunungalunnaq nunap sajunnera ilaavoq.


6. Innuttaasunut paasititsiniaasoqarniarpa?

Akissut: Apeqqutit matuma siulianiittut marluk assigalugit paasissutissiisarneq
marloqiusaavoq, najukkamut aamma nuna tamakkerlugu, pisup annertussusia
apeqqutaalluni. Nuna innuttaasunut ulorianartorsiortitsisumik sajussappat,
kommuni imaluunniit Kalaallit Nunaanni Upalungaarsimanermut
Ataatsimiititaliarsuaq innuttaasunut ilisimatitsissaaq. Sumiiffimmilu
aalajangersimasumi oqartussat naliliippata immikkut ittumik
ulorianartorsiortoqarneranik imaluunniit innuttaasunut pisariaqanngitsumik

annilaangatitsisumik aalajangersimasumik aarlerinartorsiortoqarneranik
paasissutissiisoqassaaq.

Maannamut nunap sajunneranit aarlerinartunik innuttaasunut paasissutissanik
nassiussinissamut pisariaqarsimanngilaq.

Inussiarnersumik inuulluaqqusillunga


Peter Borg